



8. Tschanteda dal cussagl cumünel in marcaldi, ils 24.4.2013 a las 19.00 in chesa cumünela S-chanf

Presidi: Duri Campell

Preschaints: Gian Andrea Bott, Ines Barblan, Gian Fadri Largiadèr, Paolo Bernasconi

Absaints:

Actuar: Duri Schwenninger

Tractandas:

1. Protocol
2. 0.211 Dumandas da fabrica
3. 0.205 Rendaquint 2012, 1. lectüra
4. 0.124 Qualited da la cuntredgia, tscherna commember per la grupp da lavur regiunela
5. 2.100 Lavur sociela in scoula
6. 5.600 Societed abiter fin 25, dumanda per sustegn finanziel, respectivmaing dumanda commembranza tar la societad
7. 2.200 Commembranza associaziun pedagogia curativa scoula speciela Engiadin'Ota
8. 8.100 Tagl da god Pignaint, 2. etappa, surdeda da lavur
9. 8.100 Sanaziun via god Punt Ota - alp Dros Bunom, surdeda da lavuors
10. 8.100 Sanaziun via Prasüras - Punt da Scrigns, surdeda da lavuors
11. 0.210 Contrat da dret da fabrica cun la Confederaziun per la Villa Gredig
12. 9.999 Varia

La glista da tractandas vain approveda sainza objecziuns.

Protocol: Il protocol da la tschanteda dals 10.04.2013 vain approvo unanimamaing.

**50 0.211 Dumanda da fabrica
Ouvras Electricas Engiadina, annunzcha montascha antenna
parabolica**

Il cussagl piglia cugnuschentscha da l'annunzcha da las Ouvras Electricas Engiadina per munter ün'antenna parabolica vi a l'edifizi sün parcella nr. 288 in Vuorcha. Il cussagl nun ho üngünas objecziuns.

**51 0.211 Dumanda da fabrica
Repower, annunzcha da fabrica s-chev tres la via in Somvih**

In connex cul fabricat da Beate e Peter Angelini ho la Repower da spuster la lingia da tensiun mezzauna. Cun fer ils s-chevs neccessaris s'ho constatato, chi saja indispensabel da chaver travers tres la via. La Repower garantischa, cha la via po gnir transida inavaunt d'uraunt las lavuors e cha la via vain refatta in stedi oriunt. Il cussagl nun ho üngünas objecziuns.

**52 0.211 Dumanda da fabrica
Badilatti Bruno, nouva sarinera e pürificaziun da l'ova, nouv bagn**

Il cussagl piglia cugnuschentscha da la dumanda da Bruno Badilatti per üna nouva sarinera e pürificaziun da l'ova scu eir per ün nouv bagn sün parcella nr. 724 e 725 in Varusch. Siand cha'l fabricat as rechatta dadour la zona da fabrica decid'il cussagl unanimamaing d'inoltrer la dumanda a l'uffizi per il svilup dal territori Grischun cun la proposta d'aderir quella.

**53 0.205 Rendaquint/planisaziun da finanzas
Rendaquint 2012, 1. lectüra**

Il contabel es preschaint per quista tractanda e'l cussagl fo üna prüma lectüra dal rendaquint 2012. Zieva chi sun gnidas dedas tuottas infuormaziuns necessarias dal contabel scu eir dal president propuon'il cussagl da suottametter il rendaquint al revisur.

**54 0.124 Nominas
Qualited da la cuntredgia, tscherna commember per la gruppa da lavur regiunela**

Ils 9 avrigl 2013 ho l'uffizi chantunel infurmo a Samedan sur dal svilup da la politica d'agrara. La politica agrara 2014-2017 prevezza, cha la qualited da la cuntredgia sün la surfatscha agrara ütiliseda e sün las alps dess gnir sustgnida. La regiun Engiadin'Ota es üna da las regiuns, chi dess gnir elavuro il proget "Landschaftsqualität" e lotiers vegnan eruieus ils giavüschs dal public cun funder gruppas da lavur. In quellas gruppas da lavur dessan fer part paurs, rapreschantants da vschinaunchas, dal turissem, da l'economia forestela e guardgiasulvaschinas. Il cussagl decida unanimamaing, cha Gian Fadri Largiadèr dess fer part per nossa vschinauncha a la gruppa da lavur.

**55 2.100 Scoula primara
Lavur sociela in scoula**

La scoula da La Plaiv scu eir las scoulas primaras e scoulinas da las vschinaunchas da S-chanf, Zuoz e La Punt Chamues-ch haun previs d'introdür üna lavur sociela in scoula. Per evader la lavur dess gnir ingascho ün lavuraint sociel. Ils cuosts totels da l'impieghi muntan a fr. 100'000.00. Tenor clef da scumpart da la scoula da La Plaiv SFM importa la part per nossa vschinauncha arduond fr. 22'000.00 per an e l'import dess gnir integro i'l quint finel da la scoula La Plaiv SFM. Il cussagl decida unanimamaing da sustegner in ün prüm pass l'intent d'uraunt 3 ans, zeiva fer üna valütaziun e decider pel futur. L'import bsögnaivel dess gnir resguardo i'l preventiv da la scoula da La Plaiv SFM.

**56 5.600 Abitaziuns socielas
Societed abiter fin 25, dumanda per sustegn finenziel, respectivamaing dumanda commembranza tar la societad**

Ad es previs d'eriger a Samedan üna chesa cun abitaziuns favuraivlas per giuvens fin 25 ans. La societad "abiter fin 25" es gnida fundeda l'an passo ed es la purtedra dal proget. Quella voul construir e mner la chesa cun 27 abitaziuns. Il cussagl piglia cugnuschentscha da la dumanda da la societad per ün sustegn finenziel, respectivamaing cun la dumanda scha nossa vschinauncha vulesse fer part a quella. Il cussagl decida

unanimamaing da sustegner la societad cun ün import da fr. 1'000.00 e da fer part a quella.

**57 2.200 Scoula speciela
Commembranza associaziun scoula speciela pedagogia curativa
Engiadin'Ota**

L'associaziun scoula speciela pedagogia curativa d'Engiadin'Ota es gnida fundada l'an 1988 per iffaunts chi haun dabsögn d'ün sustegn extraordinari e nu paun gnir chüros scu scolars da la classa pitschna. A quella faun part tuot las vschinaunchas da l'Engiadin'Ota, cun excepziun da nossa vschinauncha. L'an passo es gnieu fat üna revaisa dals statuts e lo s'ho constatto, cha la vschinauncha da S-chanf nun es commembra. Zieva animeda discussiun decid'il cussagl da metter inavous la tractanda, causa chi'd es necessari da fer auncha püs sclarimaints in chosa.

**58 8.100 Forestel
Tagl da god Pignaint, 2. etappa, surdeda da lavur**

Per fer la seguond'etappa dal tagl da laina dal god Pignaint s'ho trat aint offertas. Resguardand l'import previs il preventiv 2013 surdo il cussagl unanimamaing la lavur a la firma Thomann Forst AG da Parsonz, per l'import da fr. 92'880.00, inclus l'imposta sülla püvalur. La laina vain vendida medemmamaing a la firma Thomann Forst AG da Parsonz pel predscha da fr.106.00/m³ per laina suot imsüra, fr. 109.00/m³ per laina sur imsüra e fr. 80/m³ per laina inferiura.

**59 8.100 Forestel
Sanaziun via god Punt Ota - alp Dros Bunom, surdeda da lavuors**

In connex cun las lavuors per refer la via da god Punt Ota fin alp Dros Bunom ho l'uffizi da god e prievels da la natüra scrit our las lavuors. Il cussagl piglia cugnuschentscha da la valütaziun da las 5 offertas tres l'uffizi chantunel. Il cussagl decida unanimamaing da surder la lavur, tenor proposta da l'uffizi chantunel, a la firma Rocca & Hotz SA da Zuoz per l'import offert da fr. 72'792.00 inclus l'imposta sülla püvalur. Tar la surdeda s'ho resguardo l'offerta cun la megltra valütaziun.

**60 8.100 Forestel
Sanaziun via Prasüras - Punt da Scrigns, surdeda da lavuors**

In connex cun las lavuors per refer la via Prasüras fin Punt da Scrigns ho l'uffizi da god e prievels da la natüra scrit our eir quistas lavuors. Il cussagl piglia cugnuschentscha da la valütaziun da las 5 offertas tres l'uffizi chantunel e decida unanimamaing da surder la lavur, tenor proposta da l'uffizi chantunel, a la firma Angelini SA da S-chanf per l'import offert da fr. 74'405.50 inclus l'imposta sülla püvalur. Tar la surdeda s'ho resguardo l'offerta la pü favuraivla.

**61 0.210 Contrats e cunvegns
Contrat da dret da fabrica cun la Confederaziun per Villa Gredig**

Il cussagl piglia cugnuschentscha dal sböz dal contrat per surpiglier la Villa Gredig a Chapella in dret da fabrica cun üna düreda da 60 ans. Il cussagl fo üna lectüra dal contrat e decida unanimamaing da suottametter quel a la prosma radunanza cun la proposta d'accepter quel. Inavaunt decida'il cussagl da der l'incumbenza al giurist da formular ün contrat traunter la vschinauncha da S-chanf e la Fundaziun Chapella per der inavaunt la fittada da la Villa Gredig a la Fundaziun Chapella cun las medemmas cundiziuns. Tuots 2 contrats dessan gnir suottamiss a la prosma radunanza cumünela.

62 9.999 Varia

Da quista tractanda nu vain fat adöver.

A las 22.35 vain la tschanteda alveda.

In buna fè

L'actuar:
D. Schwenninger